

Evening Dogri News Bulletin, 14 March 2025

समे .18:15 Hrs

Headlines

1. जम्मू-कश्मीर सरकारै सड़क सुरक्षा नीति 2025 गी अधिसूचित कीता। 2030 तगर सड़के हादसैं ते मौतें च 50 प्रतिशत कमी लेयाने लेई सरकार प्रतिबद्ध।
2. विदेश मंत्रालय नै रेल गड्डी हाईजैक च भारत दी शमूलियत बारै पाकिस्तान दे दावे गी खारिज कीता। इस्लामाबाद गी अपने अंदर झांकने लेई आखेआ।
3. रंगें दा त्यौहार होली जम्मू-कश्मीर च बी जोश जज्बे कन्नै मनाया जा करदा ऐ। उपराज्यपल ते मुखमंत्री होरें लोकें गी होली दियां शुभकामनां दितियां।
4. सरकार नै जम्मू जिले च 5 औद्योगिक पार्क खडेरने दा प्रस्ताव रक्खेआ। एहदे ने 2000 शा बह रोजगार दे मौके पैदा होंगन।
5. कर्मचारियें ते पेंशनरें दा महंगाई भत्ता-डीए 246 प्रतिशत तगर बढ़ाया गेआ।
6. खेडू मंत्रालय नै राश्ट्री संहिता दे मसौदे पर लोकें थमां सुझा ते प्रतिक्रिया मंगियां न।

<><><><><><>

Road-Safety

शिड़क हादसैं दौरान लोकें दे जखमी ते होने आहिलियें मौतें पर रोक लाने दे मकसद कन्नै जम्मू-कश्मीर सरकार नै जम्मू-कश्मीर सड़क सुरक्षा नीति 2025 गी अधिसूचित कीता ऐ। नमी नीति च सरकार नै 2030 तगर शिड़क हादसैं ते मौतें च 50 फीसदी कमी लेआने दा लक्ष्य रक्खेआ ऐ। एहदे च राज्य सड़क सुरक्षा परिषद दा गठन करियै

संस्थागत बवस्था गी निगगर कीता गेआ ऐ जेदी नुमायंदगी ट्रांसपोर्ट मंत्री करंगन ते इक्क मुख एजेंसी दी नुमायंदगी अतिरिक्त ट्रांसपोर्ट कमिशनर सतह दे अफसर करंगन। इन्दे अलावा नगर निगम विकास प्राधिकरण शङ्कें कंडे पार्किंग ताई फीस लैनी लोडचदी जेड़ी समें कन्नै बददी रौहगं सङ्कें पर दबा घट्ठ करने ताई सरकार निजी गड्डियें दे इस्तेमाल करने दे बजाय लोकें गी आम गड्डियें दा इस्तेमाल करने लेई नमियां सुविधां अपनाग। सङ्क सुरक्षा नीति 2025 पर संदोख प्रगट करदे होई ट्रांसपोर्ट मंत्री सतीश शर्मा होरें आखेआ जे नमी नीति च जम्मू-कश्मीर ट्रांसपोर्ट पुलस मोटर गड्डियें आहले मैहकमे कन्नै तालमेल बनाइयै यातायात दे म्यार च सुधार आहनने दी हर मुमकन कोश्ट करोग। एहदे तैहत नियम कायदें दी खलाफवर्जी करने आहलें खलाफ कार्रवाई कीती जाग।

<><><><><><>

India-Pakistan

भारत नै पाकिस्तान दे उनें आरोपें दा खंडन कीता ऐ जिंदे च उत्थे रेल गड्डी अपहरण आहले मामले च भारत दा हत्थ होने दी गल्ल आक्खी गेई ऐ। पाकिस्तान दे आरोपें पर मीडिया दे सोआलें दे परते च विदेश मंत्रालय दे प्रवक्ता रणधीर जायसवाल होरें आखेआ जे भारत पाकिस्तान दे बिजन कुसै आधार दे आरोपें गी साफ तौरा पर खारिज करदा ऐ। उनें आखेआ जे समूलची दुनिया गी पता ऐ जे वैश्विक आतंकवाद दा केंद्र कुत्थे ऐ। प्रवक्ता नै गलाया जे पाकिस्तान गी अपनी अंदरूनी मुश्कलें ते नाकामियें लेई दुएं पर उंगली चुक्कने ते दोष मढ़ने दे बजाए अपने अंदर झांकना लोडचदा ऐ।

<><><><><><>

Holi Overall

देश दे दुए हिस्सें आहला लेखा जम्मू-कश्मीर च बी होली पूरे जोश-जज्वे कन्नै मनाई जारदी ऐ। एह त्यौहार बुराई पर अच्छाई दी जित ते बसंत ऋतु दे शुरू होने दा प्रतीक ऐ। होली दा त्यौहार बराबरी ते भाईचारे दा सनेआ दिंदा ऐ कीजे समाज दे हर वर्ग दे लोक जातपात, उम्र दे दुए भेदभाव गी पिच्छे करदे होई आपस च रलिए बड़े प्रेम कन्नै एह त्यौहार मनांदे न। जम्मू-कश्मीर दे उपराज्यपाल मनोज सिन्हा होरें ते मुखमंत्री उमर अब्दुल्ला होरें जम्मू-कश्मीर दे लोकें गी होली दी शुभकामनां दिती ऐ।

<><><><><><>

Rajouri-Holi

आपसी भाईचारे दी मिसाल पेश करदे होई हिंदू-मुस्लिम ते सिख हर वर्ग दे लोकें कट्टे रलिए होली मनाई। इक-दुए गी रंग लाइयै ढोल दी थाप पर नच्चियै ते मठाइयां बंडिए होली दा त्यौहार मनाया जाग। एह कार्यक्रम सिविल सोसायटी राजौरी नै जिला प्रशासन राजौरी कन्नै रलिए आयोजित कीत। डी.सी राजौरी, एसएसपी राजौरी ते राजौरी दे विधायक होरें इस कार्यक्रम च शिरकत कीती ते लोकें गी त्यौहार दी शुभकामनां दित्तियां। डी.सी राजौरी अभिषेक शर्मा होरें इस मौके पर आखेआ।

.....बाईट.....

<><><><><><>

Holi-Samba

प्रदेश दे होनें हिस्सें आंगर साम्बा जिले च बी होली दा त्यौहार रंगें कन्नै खेडदे ते मठाइयां बंडदे होई मनाया गेआ। इस मौके अपनी खुशी जाहिर करदे होई स्थाडे जिला संवाददाता कन्नै गल्ल करियै किश नौजवानें आखेआ।

<><><><><><>

Kathua-Holi

कठुआ च बी होली रिवायती अंदाज च जोश जज्बे कन्नै मनाई गेई। होली मनारदे नौजोआनें जुम्मा दी नमाज अता करारदे मुसलमान भ्राएं दा सम्मान कीता। गणेश उत्सव कमेटी नै होली मिलन समारोह ते मटकी फोड़ कार्यक्रम दा बी सरिस्ता कीते दा हा।

<><><><><><>

Jammu-Namaz

रमजान दे पाक म्हीने च दुए जुम्मे दे मौके बड्डी गिनतरी च मुस्लिम समुदाय कठुआ दी जामा मस्जिद च कट्टा होआ ते खास नमाज अता कीतीं उनें जम्मू-कश्मीर दी शांति ते खुशहाली आस्तै दुआ कीती। मुस्लिम वेलफेयर कमेटी दे प्रधान शकील अहमद होरें आखेआ जे अज्ज दा ध्याड़ा हिंदू-मुस्लिम दौनें आस्तै खास ऐ जेकर दौनें

समुदाय दे लोक अपने-अपने त्यौहार पूरी आजादी ते श्रद्धा कन्नै मनारदे न। उनें हिंदू भ्राएं गी होली दी मुबारकबाद दिती ते आपसी भाईचारा कायम रखने आस्तै धन्नवाद बी कीता। शकील अहमद होरें आखेआ।

जाकिर हुसैन होरें बी इस मौके अपने विचार सांझा कीते।

<><><><><><>

Industry

जम्मू-कश्मीर सरकार नै पंज औद्योगिक पार्कें दी स्थापना लेई 500 कनाल ज़िमीं गी बंज बपार मैहकमे दे नां पर अलाट कीता ऐ। एहू औद्योगिक पार्क अखनूर डीली, रणबीर सिंह पुरा ते जम्मू तहसीलें च बनाए जांगन। आकाशवाणी दे जम्मू संवाददाता नै दस्सेआ ऐ जे विधानसभा दे चलारदे बजट इजलास च प्रश्नकाल दौरान भाजपा दे सीनियर लीडर ते जम्मू उत्तर दे विधायक शाम लाल शर्मा हुंदे आसेआ पुट्टे गेदे सोआलें दे परते च बंज बपार मैहकमे सुरिंद्र चौधरी हुंदे लिखित परते च एहू गल्ल सामने आई। ध्यानजोग ऐ जे तजवीजशुदा औद्योगिक पार्कें कन्नै मकामी बसनीकें लेई कम्म रोजगार दे तकरीबन 2074 मौके पैदा होने दी मेद ऐ। इनें पार्कें लेई कुल 41 रास-पूंजी लाने आहले अजे तोड़ी पंजीकरण करोआई लैता ऐ।

<><><><><><>

JK Employees DA

जम्मू-कश्मीर सरकार नै वेतन आयोग तहत कर्मचारियें ते पेंशनरें लेई महंगाई भत्ते ते पेंशनरें लेई महंगाई भत्ते-डी.ए गी 239 प्रतिशत थमां बदाइयै 246 प्रतिशत करी दिता ऐ। आकाशवाणी दे जम्मू संवाददाता नै खबर दिती ऐ जे वित्त विभाग दे इक आदेश मूजब तरमीमशुदा डी.ए पहली जुलाई 2024 थमां लागू होग। जुलाई 2024 थमां फरवरी 2025 तगर दा बादू बकाया मार्च 2025 च नकद तकसीम कीता जाग ते औदे कोला बाद म्हीनेवार तनखा चा पेंशन च शामिल करी दिता जाग। हुकम च इब्बी आखेआ गेआ ऐ जे भुगतान अगले उच्चतर रूपै च पूरा करियै लागू होग।

<><><><><><>

North East Saffron Hub

केंद्री विज्ञान ते प्रौद्योगिकी राज्यमंत्री डाक्टर जितेंद्र सिंह होरें आखेआ ऐ जे पूर्वोत्तर खेत्तर विकसित भारत दे सुखने गी सच करने च महत्वै आहली भूमिका निभा करदा ऐ ते एह खेत्तर देसै च केसर दी खेती दा अगला महत्वै आहला केंद्र बनोगा। अज्ज शिलांग च नार्थ ईस्ट सेंटर फार टेक्नालजी एप्लीकेशन एंड रिसर्च दे नमी स्थायी परिसर दा नींह पत्थर रखदे होई उनें गलाया जे सरकार दी मिशन केसर पहल दे तहत 2021 थमां सिक्किम, अरुणाचल प्रदेश ते मेघालय च केसर दी खेती कीती जा करदी ऐ। श्री सिंह होरें दस्सेआ जे अरुणाचल प्रदेश दे मेंचुखा ते सिक्किम दे चुकसोम च हुन बड्डे पैमाने पर केसर दी खेती कीती जा'रदी ऐ। एह पूर्वोत्तर क्षेत्र गी जम्मू-कश्मीर दे पाम्पोर मगरा भारत दा अगला केसर दा केंद्र बनोगा।

<><><><><><>

Fisheries

मच्छी पालन सरबन्धी राष्ट्रीय विकास बोर्ड रामबन मच्छी पालकें दी समर्था गी बदाने ताई बक्ख-बक्ख जागरूकता शिविरें दा सरिस्ता करारदा ऐ। इस पहल दा मकसद मच्छी पालन ते पानी कन्नै जुडी दी कृषि च उद्यमशीलता, तकनीकी तरक्की ते स्थिरता गी बढ़ावा देने दे कन्नोकन्नी मच्छी पालन स्टार्ट अप रायं उत्पादन ते समर्था गी बदाना ऐ। इनें शिविरें च करसानें गी केंद्र प्रायोजित स्कीमें ते सब्सिडी दे लाहें बारै दस्सेआ दसाया जा'रदा ऐ। स्हाढे संवाददाता कन्नै गल्ल करदे होई मच्छी पालन मैहकमे रामबन दे सहायक निदेशक अताउल्लाह खान होरें आखेआ।

<><><><><><>

Earthquake

लद्दाख दे कारगिल च अज्ज बड्डुलै 5 दशमलव 2 तीव्रता आहला भूंचाल आया जेदा झटका जम्मू-कश्मीर च बी सेई कीता गेआ। राष्ट्रीय भूंचाल विज्ञान केंद्र मूजब भूंचाल बड्डुलै 2 बज्जियै 50एं मिनटें पर 15 किलोमीटर दी गहराई पर आया। एहदे च कुसै चाल्ली दे जानी जां फी माली नुकसान दी कोई सूचना नेई ऐ। ध्यानजोग ऐ जे लद्दाख देसै दे भूंकप आहले खेत्तर-4 पौंदा ऐ जेदा मतलब ऐ भूंचाल दे लिजाह कन्नै एह इलाका मता खतरे आहला ऐ।

<><><><><><>

Sports-Ministry

युवा मामले ते खेड्डें सरबन्धी मंत्रालय नै खेड्डें च उम्र सरबन्धी धोखाधड़ी खलाफ राश्ट्रीय संहिता NA AA FS-2025 दे मसौदे पर आम जनता ते एहदे कन्नै जुड़े दे लोकें थमां प्रतिक्रिया ते सुझा मंगे न। इंदा मुख मकसद खेड्डें च उम्र कन्नै जुड़ी दी धोखाधड़ी पर रोक लाना, सेई एथलीटें दे अधिकारें दी राखी करना ते विजन पक्खपात दे मुकाबलें गी यकीनी बनाना ऐ। प्रस्तावित संहिता च उम्र दे रिकार्ड च हेराफेरी करने पर सख्त सजा दा प्रावधान रक्खेआ गेआ ऐ। हितधारक ते आम जनता इस म्हीने दी 31 तरीक तगर मंत्रालय गी अपने सुझा देई सकदे न।

<><><><><><>